

四庫全書

史部

欽定四庫全書卷

蜀中廣記卷六十五

明 曹學佺 撰

方物記第七

茶譜

茶經畧云巴峽川有兩人合抱者伐而縱之其樹如瓜
蘆葉如梔子花如白薔薇質如拼櫚葉如丁香根如胡
桃其字或從草或從木其名一曰茶二曰檟三曰葭四

曰茗五曰薺其具有名穿者巴川峽山紉穀皮為之呂
百二十斤為上穿八十斤為中穿五十斤為小穿其器
有火筴者一名筋蜀以鍤或熟銅製之在漢揚雄司馬
相如之徒皆飲焉滂時浸俗盛于兩都并荆渝間矣
爾雅云檟苦茶也郭璞注早取為茶晚取為茗或曰薺
蜀人名之為苦茶故弘君舉食檟有茶薺出蜀之文而
揚子雲方言謂蜀西南呼茶為檟也

本草經曰茗生益州川谷一名游冬凌冬不死味苦微

寒無毒治五臟邪氣益意思令人少卧毛文錫茶譜云
蜀中晉源洞口橫源味江青城俱產橫源有雀舌鳥嘴
用麥顆嫩芽造成蓋取形似又云彭州有蒲村壩口灌
口茶園名仙崖石花等其茶餅小而布嫩芽如六出花
者尤妙又云綿州龍安縣生松嶺關者與荊州同西昌
昌明神泉等縣連西山生者並佳生獨松嶺者不堪采
擷吳曾漫錄云茶之貴白東坡能言之獨綿州彰明縣
茶色綠白樂天詩云渴嘗一盞綠昌明今彰明即唐昌

明也彰明志治北有獸目山出茶品格亦高謂之獸目
茶山下有百匯龍潭凡三長流不竭予詢諸安縣令則
以此地上下四旁俱屬彰明獨中間一寺屬安縣出茶
名香水茶晉劉琨與兄子羣書曰前得安州乾茶二斤
吾患體中煩悶恒仰真茶汝可信信致之即此茶也

華陽國志云什邡出好茶茶經云漢州綿竹縣生竹山
者與潤州同生蜀州青城縣丈人山者與綿州同又云
劍南以彭州為上生九隴縣馬鞍山至德寺堦口鎮者

與襄州同味又云青城縣有散茶末茶尤好遊梁雜記云
玉壘關寶唐山有茶樹懸崖而生芽出長三寸或五寸
始得一葉或兩葉而肥厚名曰沙坪乃蜀茶之極品者

文選註峩山多藥草茶尤好異於天下華陽國志犍為
郡南安武陽皆出名茶茶經云眉州丹稜縣生鉄山者
與潤州同又云眉州洪雅昌闔丹稜之茶用蒙頂製餅茶
法其散者葉大而黃味頗甘苦亦片甲蟬翼之次也

茶經云臨邛數邑茶有火前火後嫩綠黃等號又有火

蕃餅每餅重四十兩党項重之如中國名山者其味甘苦大邑志霧中山出茶縣號霧邑茶號霧中茶

茶經云雅州百丈山名山者與金州同雅安志云蒙頂茶在名山縣西北一十五里蒙山之上白樂天詩茶中故舊是蒙山是也今按此茶在上清峯甘露井側葉厚而圓色紫赤味畧苦發于三月成于四月間苔蘚庇之漢時僧理真所植歲久不枯九州記云蒙者沐也言雨露常沐因以為名山頂受全陽氣其茶香芳按茶譜云

山有五峯頂有茶園中頂曰上清峯所謂蒙頂茶也為
天下所稱晁氏客話李德裕丞相入蜀得蒙餅沃於湯
瓶之上移時盡化以驗其真方輿勝覽蒙頂茶常有瑞
雲影相現故文潞公詩云舊譜最稱蒙頂味露牙雲液
勝醍醐志云蒙山有僧病冷且久遇老父曰仙家有雷
鳴茶俟雷發聲乃出可併手於中頂採摘用以祛疾僧
如法採服未竟病瘥精健至八十餘入青城山不知所
之今四頂園茶不廢惟中頂草木繁茂人跡希到云

山谷戎州與人啓云庭堅再拜喜承起居清安閣中小閣皆佳勝東樓碾茶宜作堰閘處耶尚阻參承千萬珍重

茶經云瀘州夷獠采茶常攜瓢穴其側每登樹採摘茶芽含于口中待葉展放然後置瓢中旋塞其竅還置暖處其味極佳又有麤者味辛性熱飲之療風通呼為瀘茶

馮時行云銅梁山有茶色白甘腴俗謂之水茶甲於巴蜀山之北趾即巴子故城也在石照縣南五里茶譜云南平縣狼獾山茶黃黑色渝人重之十月採貢黃山谷

荅聖從使君云此邦茶乃可飲但去城或數日土人不
善製度焙多帶煙耳不然亦殊佳今往黔州都濡月兔
兩餅施州八香六餅試將焙碾嘗之都濡在劉氏時貢
炮味殊厚恨此方難得真好事者耳又作茶詞云黔中
桃李可尋芳摘茶人自忙月團犀胯闕圓方研膏入焙
香青茗裹絳紗囊品高聞外江酒闌傳筵舞紅裳都濡
春味長都濡縣今入彭水

開縣志云茶嶺在縣北三十里不生雜卉純是茶樹味

甚佳

劍州志云劍門山顛有梁山寺產茶為蜀中奇品

南江志縣北百五十里味坡山產茶方輿勝覽詩鎗旗
爭勝味坡春即此

廣雅云荆巴間採茶作餅成以米膏和之欲煮飲先炙
令色赤擣末置瓷器中以湯燒覆之用葱薑芼之即茶
之始說也按今蜀人飲擂茶是其遺制

唐書吳蜀供新茶皆於冬中作法為之太和中上務茶

儉不欲逆物性詔所貢新茶宜於立春後造

曾公類說云蘇才翁與蔡君謨聞茶君謨用惠山泉蘇茶小劣用竹瀝水煎遂能取勝才翁舜元字

偽蜀時毛文錫撰茶譜記茶事甚悉末以唐人為茶詩文附之

晉張載成都樓詩芳茶冠六清溢味播九區杜育荈賦曰靈山惟嶽奇產所鍾厥生荈草彌谷被岡承豐壤之滋潤受甘露之宵降月惟初秋農功少休結偶同旅是采

是求水則岷方之注挹彼清流器澤陶簡出自東隅酌之以匏取式公劉惟茲初成沫沈華浮煥如積雪爆若春敷

唐孟郊憑周況先輩於朝賢乞茶詩道意忽乏味心緒病無棕蒙茗玉花盡越甌荷葉空錦水有鮮色蜀山饒芳聚雲根纔剪綠印縫已霏紅曾向貴人得最將詩叟同幸為乞寄來救此病劣躬白傳謝李六郎中寄新蜀茶詩故情周匝向交親新茗分張及病身紅紙一封書後

信綠芽十片火前春湯添勺水煎魚眼末下刀圭攪麴塵
不寄他人先寄我應緣我是別茶人又謝蕭員外寄新
蜀茶詩蜀茶寄到但驚新渭水煎來始覺珍滿甌似乳堪
持翫況是春深酒渴人薛能謝蜀州鄭使君寄烏嘴茶八
韻烏嘴擷渾芽精靈勝鑊錫烹嘗方帶酒滋味更無茶
拒碾乾聲細撐封利穎斜銜蘆齊勁實啄木聚精華鹽
損漆常誠薑宜著更誇得來拋道藥攜去就僧家旋覺
前甌淺還愁後信賒千慙故人意此物敵丹砂鄭谷蜀

中嘗茶詩簇簇新英摘露光小江園裏火煎嘗吳僧謾
說鴟山好蜀叟休誇鳥嘴香合座半甌輕泛綠開緘數
片淺含黃鹿門病客不歸去酒渴更知春味長施肩吾
蜀茗詞越碗初盛蜀茗新薄煙輕處攪來勻山僧問我
將何比欲道瓊漿却畏噉成文幹煎茶詩岳寺春深睡
起時虎跑泉畔思遲遲蜀茶倩箇雲僧碾自拾枯松三
四枝

宋文與可謝人寄蒙頂新茶詩蜀土茶稱盛蒙山味獨

珍靈根托高頂勝地發先春幾樹初驚暖羣藍競摘新
蒼條尋暗粒紫萼落輕鱗的皪香瓊碎藍鬢綠蠆勻慢
烘防熾炭重碾敵輕塵無錫泉來蜀乾峭盞自秦十分
調雪粉一啜嚙雲津沃睡迷無鬼清吟健有神冰霜疑
入骨羽翼要騰身磊磊真賢宰堂堂作主人玉川喉吻
澁莫惜寄來頻

魏鶴山邛州先茶記曰昔先王敬共明神教民報本反
始雖農耆坊庸之蜡門行戶灶之享伯侯祖彝之靈有

開厥先無不宗也至始為飲食所以為祭祀賓客之奉者雖一飯一飲必祭必見其所祭然況其大者乎眉山李君鏗為臨邛茶官吏以故事三日謁先茶告君詰其故則曰是韓氏而王號相傳為然實未嘗請命於朝也君於是撤舊祠而增廣焉且請于郡上神之功狀于朝宣錫號榮以侈神賜而馳書於予命記成役予於事物之變必迹其所自來獨於茶未知所始蓋古者賓客相敬之禮自饗燕食飲之外有間食有稍事有歡湑有設

梁有糯醬有食已而醕有坐久而葷有六清以致飲有
瓠葉以嘗酒有旨蓄以御冬有流荇以為豆菹有湘蘋
以為鉶芼見於禮見於詩則有挾菜副瓜烹葵叔苴之
等雖葱芥韭蓼葷粉滷瀹深蒲菹筍無不備也而獨無
所謂茶者徒以時異事殊字亦差誤且今所謂韻書自
二漢以前上泝六經凡聲御暮之同是音本無它訓乃
自音韻分于孫沈反切盛於羌胡然後別為麻馬等音
於是魚歌二音併入于麻而魚麻二韻一字二音以至

上去二聲亦莫不然其不可通則更易字文以成其說
且茶之始其字為荼春秋書齊荼漢志書荼陵之類陸
顏諸人雖已轉入茶音而未敢輒易字文也若爾雅若
本草猶從艸從余而徐鼎臣訓荼猶曰即今之茶也惟
自陸羽茶經盧仝茶歌趙贊茶禁以後則遂易茶為茶
其字為艸為入為木陸璣謂椒佀茱萸吳人作茗蜀人
作茶皆煮為香椒與茶既不相入且據此文又若茶與
茗異此已為可疑而山有樗之疏則又引璣說以樗葉

為茗蓋使讀者瞽亂莫知所據至蘇文忠始為周詩記
苦茶茗飲出近世其義亦既著明然而終無有命茶為
茶者蓋傳注例謂茶為茅秀為苦菜予雖言之誰實信
之雖然此特書名之誤耳而予於是重有感於世變焉
先王之時山澤之利與民共之飲食之物無征也自齊
人賦鹽漢武榷酒唐德宗稅茶民之日用飲食而皆無
遺筭則幾於陰復田賦潛奪民產者矣其端既啓其禍
無窮鹽酒之入遂埒田賦而茶之為利始也歲不過得

錢四十萬緡自王涯置使拘權由是歲增月益塌地剩
茶之名三說貼射之法招商收稅之令紛紛見於史冊
極於蔡京之引法假託元豐以盡更仁祖之舊王黼又
附益之嘉祐以歲課均賦茶戶歲輸不過三十八萬有
奇謂之茶租錢至熙寧以後歲入之息驟至二百萬緡
視嘉祐益五倍矣中興以後盡鑒政宣之誤而茶法尚
仍京黼之舊國雖賴是以濟民亦因是而窮是安得不思所
以變通之乎李君字叔立文簡公之孫文簡嘗為茗賦者

熙寧七年始遣三司幹當公事李杞入蜀經畫買茶於秦鳳熙河博馬以著作佐郎蒲宗閔同領其事諸州勑設官場歲增息為四十萬而重禁榷之令自是蜀茶盡榷至李稷加息為五十萬陸師閔又加為百萬元祐元年侍御史劉摯奏疏曰蜀茶之出不過數十州人賴以為生茶司盡榷而市之園戶有茶一本而官市之額至數十斤所給錢靡耗於公者名色不一給借保任輸入視驗皆牙僧主之故費於牙僧者又不知幾何是官於

園戶名為平市而實奪之園戶有逃亡而免者有投水而免者而其害猶及鄰伍欲伐茶則存禁欲增植則加市故其俗論謂地非生茶也實生禍也願選使者考茶法之弊以蘇蜀民右司諫蘇轍繼言造立茶法皆傾險小人不識事體且備陳五害呂陶亦條上利害既而摯又言陸師閔恣為不法不宜仍任事師閔坐罷未幾蒲宗孟亦以附會李稷罷稷邛州人以父絢蔭厯管庫提舉蜀部茶場甫兩歲羨課七十六萬緡與李察皆以苛

暴著時人為之語曰寧逢黑煞莫逢稷察

紹聖元年復以蒲師閔都大提舉成都等路茶事凡茶法並用元豐舊條初神宗時熙河運司以歲計不足乞以官茶博糴每茶三斤易粟一斛朝廷謂茶馬司本以博馬不可以博糴於茶馬司歲額外增買川茶兩倍茶朝廷別出錢二百萬給之令提刑司封樁又令茶馬司兼領轉運使由是數歲邊用粗足

建炎元年成都轉運判官趙開言權茶買馬五害請用

嘉祐故事盡罷榷茶而令漕司買馬或未能然亦當減額以蘇園戶輕價以惠行商如此則私販衰而盜賊息遂以開主管秦川茶馬二年開大更茶法按中興小厯建炎軍興令商旅園戶自行買賣官給茶引白取息錢所賣茶引一百斤計取息錢六貫五百文改成都茶場為合同場仍置茶市交易者必由市引與茶相隨此即開之法也

酒譜

譙周已蜀異物贊云文章作酒能成其味按本草文章

草卽五加皮別名今蜀人重府酒一名皮酒卽此

齊民要術云蜀人作醪酒法十二月朝取流水五斗漬小麥麴二斤密泥封至正月二月凍釋發之漉去滓但取汁三斗投米三斗炊作飯調強軟合和復密封數十日便熟合滓餐之甘辛滑如甜酒味不能醉人人多啖溫溫小煖而面熱也

唐書劔南歲貢春酒十斛采蘭雜誌云卓文君井在卬州白鶴驛世傳文君嘗取此水以釀酒按五代詞有卓

女燒春濃美之句註燒春酒名也又國史補註劔南貢燒春即是物矣

盛弘之曰永安宮西有巴鄉村善釀酒名巴鄉清郡國志曰南鄉峽西八十里有巴鄉村善釀酒故俗稱巴鄉酒也今其地屬雲陽老杜詩聞道雲安麴米春本此

嘉州大佛峽人家白酒舊有名蘇東坡送張嘉州詩但願身為漢嘉守載酒時作凌雲遊笑談萬事真何有一時付與東岩酒是也岑參狂歌行贈四兄云今年思我

來嘉州嘉州酒重花繞樓樓頭吃酒樓下卧長歌短歌
還相酬陸游詩平羌江水接天流涼入簾櫳已似秋公
事無多厨釀美此身端不負嘉州

古郾志縣人劉大竹傾春釀其中號郾甬酒相傳山濤
為郾令用筠管釀茶蘼作酒兼旬方開香聞百步方輿
云龍渠縣東十五里有山出藤可以引酒曰引藤山出
釣藤酒又杜詩黃羊飯不羶蘆酒還多醉蓋以蘆筒吸
酒亦引藤之類也珙志縣有木曰酸桶夷人漬其葉點

豆汁為腐又有麻柳其葉似楠夷人粉以作酒云

西京雜記司馬相如初與卓文君還成都居貧愁懣以
所著鸛鷀裘就市人陽昌貰酒與文君為歡既而文君
抱頸泣曰我平生富足今乃以衣裘貰酒遂相與謀於
成都賣酒相如親著犢鼻褌滌器以恥王孫王孫果以
為病乃厚給文君

漢書楊雄以疾免復召為大夫家貧嗜酒人希至其門
時有好事者載酒從之學焉

蜀志曰先主以天旱禁酒釀者有刑吏於人家索得釀具論者欲令與作酒者同罰簡雍與先主遊觀見一男女行道雍曰彼人欲行淫先主曰何以知之雍曰彼有其具與欲釀者同先主咲而原之

揚雄酒賦曰子猶瓶矣酒醪不入口藏水滿懷自用如此不如鴟夷鴟夷滑稽腹大如壺盡日盛酒人復藉酤常為國器托於屬車出入兩宮經營公家由是言之酒何過乎

庾信蒙趙王賁酒詩曰正旦辟惡酒新年長命杯栢葉
隨銘至椒花逐頌來流星向椀落浮蟻對春開成都已
救火蜀使何時回

駱賓王春酒詩朔空曾紀歷帶地舊疏泉色汎臨邛瑞
香流赴蜀仙欸交欣散玉怡友悅沈錢無復中山賞空
吟吳會篇

高適春酒詩故人美酒勝濁醪故人清詞合風騷長歌滿
酌惟吾曹高談正可揮塵毛半醉忽然持解蟹洛陽告

捷傾前後武侯腰間印如斗郎官無事時飲酒杯中綠
蟻吹轉來甕上飛花拂還有前年持節將楚兵去年留
司在東京今年復拜二千石盛夏五月西南行彭門劍
門蜀山裏乍聞軍人劫奪我到家但見妻與子賴得飲
君春酒數十杯不然令我愁欲死

李崇嗣絕句聞道成都酒無錢亦可求不知將幾斗銷
得此來愁

杜少陵謝嚴中丞送青城山道士乳酒詩山餅乳酒下

青雲氣味濃香幸見分鳴鞭走送憐漁父洗盞開嘗對
馬軍自註云軍州謂驅使騎為馬軍按韓持國謝邵堯
夫九日遠寄新酒詩云有客忽傳龍坂至開樽如對馬
軍嘗自注云錦屏山題名有記河南府使馬軍送新酒
即是杜詩出處

蘇東坡蜜酒歌西蜀道士楊世昌善作蜜酒絕醇釀余
既得其方作此遺之云真珠為漿玉為醴六月田夫汗
流漉不如春甕自生香蜂為耕耘花作米一日小沸魚

吐沫二日眩轉清光活三日開甕香滿城快瀉銀餅不
須潑百錢一斗濃無聲甘露微濁醖醕清君不見南園
採花蜂似雨天教釀酒醉先生先生年來窮到骨問人
乞米何曾得世間萬事真悠悠蜜蜂大似監河侯

陸游蜀酒歌漢州鶯黃鸞鳳雛不驚不搏德有餘眉州
玻瓈天馬駒出門已無萬里塗病夫少年夢清都曾賜
虛皇碧琳腴文德殿門晨奏書歸局黃封羅百壺十年
流落狂不除遍走人間尋酒壚青絲玉瓶到處酤鶯黃

玻璃一滴無安得豪士致連車倒瓶不用盃與盃琵琶
如雷聒坐隅不愁渴死老相如

黃山谷云廖致平送綠荔支王公權送荔支綠酒俱為
戎州第一因作詩以紀之王公權家荔支綠廖致平家
綠荔支試傾一椀重碧色快剝千顆輕紅肌潑醅葡萄
未足數堆盤馬乳不同時誰能同此勝絕味唯有老杜
東樓詩又荔支綠頌為王公權作云王牆東之美酒得
妙用於六物三危露以為味荔支綠以為色哀白頭而

投齋每傾家以繼酌忘魑魅之躩觸見醉鄉之城郭揚
大夫之拓落陶徵君之寂寞惜此士之殊時常生塵於
尊勺又示知命弟詞云乍晴秋好黃菊歌烏帽不見清
談人絕倒更憶添丁小小蜀娘謾點花酥酒槽空滴真
珠兄弟四人別住他年同挿茱萸又於戎州荅唐彥道
庭堅比因三家作酒皆美以飲客因作三頌謾往一笑
有金桃粽糝二頌熱倦未暇錄也

宋初諸州城內皆置務釀酒縣鎮鄉間或許民釀而定

其歲課三京官造麴聽民納直以取川峽承舊制賣麴價重開寶二年詔減十之二既而頗興權酷言事者多陳其非便太平興國七年罷仍舊賣麴自是惟夔達開施瀘黔涪黎威州梁山雲安軍及河東之麟府州荊湖之辰州福建之福泉汀漳州興化軍廣南東西路不禁建炎三年總領四川財賦趙開遂大變酒法自成都始先罷公帑實供給酒即舊襍買坊場所置隔釀設官主之民以米入官自釀斛輸錢三十頭子錢二十二明年

徧下其法於四路歲逋增至六百九十餘萬緡凡官槽
四百所私店不預焉於是東南之酒額亦日增矣朝野
雜記云建炎中總為緡錢一百四十萬趙開變法置隔
釀民願釀者米一斛輸錢三十徧四路行其法於是增
至六百九十餘萬緡王瞻叔為潼川漕請罷監槽務許
樸賣四川酒課累減之餘猶為緡錢四百五十餘萬變
路自祖宗以來不榷酒趙應祥始榷之歲取錢四萬貳
千九百餘引鄭剛中為宣撫奏除之眉州志云范成大

帥四川議減鹽酒課以蘇蜀民朱時敏白范曰榜賣之法不除則今日之惠有時而盡後時敏為都司奏曰陛下睦念全蜀歲捐上供對減酒課四十八萬德至渥也未減之前元管酒額五百五十萬既減之後今甫七年又增近五百四十餘萬矣欲乞罷榜賣之法而用推排孝宗可其奏

蜀中廣記卷六十五

欽定四庫全書

史部

蜀中廣記卷六十六

詳校官編修_臣翟槐

編修_臣程嘉謨覆勘

總校官庶吉士_臣何思鈞

校對官學正_臣陳木

謄錄舉人_臣曹勲祖

欽定四庫全書

蜀中廣記卷六十六

明 曹學佺 撰

方物記第八

鹽譜

世本曰廩君乘土船至鹽陽鹽水神女子止廩君廩君不聽鹽神為飛蟲諸神從而飛蔽日日為之晦廩君不知東西所向者七日七夜乃以青纓遺鹽神曰纓此與

爾俱生鹽神受而纓之廩君應青縷而射鹽神死按廩君宕渠巴賈之先世也後漢書曰成哀間成都羅哀訾至鉅萬初賈京師隨身數十百萬為平陵石氏持錢其人彊力石氏訾次如苴親信厚資遣之令往來巴蜀數年間致千餘萬哀舉其半賂遺曲陽定陵侯依其權力賒貸郡國人莫敢負擅鹽井之利期年所得自倍遂殖其貨焉

川西井

蜀都賦家有鹽泉之利華陽國志蜀郡廣都縣有鹽井
又有小井十數所犍為郡牛鞞縣有陽明鹽井又云李
冰識齊水脉穿廣都鹽井諸陂池蜀於是盛有養生之
饒焉郡國志云唐武德二年分魏城置鹽泉縣以地有
鹽井民得採漉為四方賈售之地按廣都今雙流牛鞞
今簡州魏城今屬左綿也陵井監圖經漢時有山神號
十二玉女為道人張陵指陵上開鹽井因此陵上有井
故名陵州雲笈七籤云張天師經行陵州山中有十二

玉女來謁願奉箕箒天師知其地下陰神也謂之曰汝等何以為獻將觀厚薄而納焉玉女各獻玉環徑皆數寸天師曰獻同奈何乃化十二環為一環徑尺投入地約曰有得者即納之投地地陷成井玉女爭脫衣入井以探環天師取其衣藏石匱中玉女遂不得出即陵井也井直下五百七十尺透兩重大石方及鹹水今每年一淘洗須歌唱喧聒然後入否則必見玉女裸居井中不利淘時或絙索斷損皮囊墜落唯於天師前炷香良

久自有為掛結者云是玉女之靈也十二玉女戌亥二
神在天餘十支在井煎鹽至戌亥時水必歇寰宇記云
益部鹽井最多而陵井最大在仁壽縣縱廣三十丈深
八十丈汲以大牛皮囊刑徒充役甚苦後廢陵井更開
狼毒井今之煮井是也又云仁壽縣五井二井存曰營
井在縣南二十五里隋大業元年開水淡遂廢至宋乾
德三年重開日收鹽四十斤曰蒲井在縣南四十里唐
武德初開水淡遂廢至宋太平興國三年重開日收鹽

三十八斤五兩三井廢曰賴賓井石羊井賴因井有
麗甘井取玉女美麗其鹽味甘為名又有聶甘井古鹽
井也其傍有神廟謂之聶社云 又貴平縣一井曰上
平在陵州東北九十三里唐朝日收鹽一石七斗五升
與百姓分利偽蜀廢乾德三年重開日收鹽一百七十
斤益州記貴平有主井官有兩竈二十八鑊一日一夜
收鹽四石如霜雪也 輿地紀勝云唱車廟在貴平舊
縣南九里漢朱辰為巴郡守有恩於人及罷吏人送辰

到蜀回至此又為立廟以其山近鹹井聞推車唱歌之
聲為廟號 寰宇記云井研縣二十一井曰研井在陵
州南百三十三里唐時日收鹽八斗貞觀二十一年崩
壞總章二年重修偽蜀淺塞宋乾德三年重開日收鹽
四十九斤曰思陵井在州南一百九里唐時官私日收
鹽五斗五升龍朔元年壞上元元年重開偽蜀淺塞乾
德二年重開日收鹽三十斤一十兩曰綾井在州南百
里日收鹽五十三斤八兩曰律井在州南九十里日收

鹽五十五斤曰田井在州南百五十一里日收鹽三十
六斤俱乾德重開已上五井存曰獠母曰還曰賴倫曰
石烈曰茫曰宋曰桶曰柳泉曰賴郎曰遮曰新曰董村
曰潘令曰小羅曰依郎曰帶已上十六井廢 井研志
縣北二里井鑊山神唐僖宗入蜀時見命祠之其山俯
臨鑊井因以為名蓋鹽神也 寰宇記始建縣七井曰
羅泉井舊廢至宋乾德三年重開日收鹽三十五斤今
存曰塔泥井石縫井賴胡儒井赤石井賴子井賴漫井

已上六井廢 文同丹淵集云井研縣自慶厯已來始
因土人鑿地植竹謂之卓筒井以取鹹泉鬻鍊鹽色後
來其民盡能此法為者甚衆遂與官中略出少月課乃
倚之為姦恣用鑄琢廣專山澤之利以供侈靡之費豪
家至有一二十井其次亦不減七八鄉時朝廷嘗亦知
其如此創置無已深慮寔久事有不便遂下本路轉運
司止絕不許開造今本縣界內已僅及百家其所謂卓
筒井者以其臨時易為藏掩官司悉不能知其的實多

少數目每一家須役工匠四五十人至三二十人皆是
他州別縣浮浪無根著之徒抵罪捕逃變易名姓來此
傭身賃力平居無事則俯伏低折與主人營作一不如
意則遙相扇誘羣黨譁譟算索工直偃蹇求去聚墟落
入鎮市飲博姦盜靡所不至已復又投一處習以為常
按始建今入井研縣

陵井監圖經云井有玉女廟號靈真夫人乃監司秦立
者若以火投井中即雷吼沸湧煙氣上衝濺泥漂石甚可

畏也或謂井泉傍通江海微有敗船木浮出云郡國志張道陵於此得鹽源因投紙排車引役人唱排車樂祀玉女於井內俗傳玉女無夫歲取一少年擲井中配之否則水竭又云狼毒井有毒龍藏井中及鹽神玉女十二為崇天師以道力驅出毒龍禁玉女於井下然後人獲鹹泉之利及周平蜀宇文貴為益州總管聞玉女之事乃曰吾為媒以嫁玉女可乎於是擇日張樂迎玉女像置於西山神祠云將玉女配山神也是時成都西

山有蟒害土人祠之歲用一童女置祠中蟒吸去則吉
不然則亂傷人云

雲笈七籤天師初以陵地荒梗無人安居山川不可耕
植化鹽井以救窮民民聚居井傍戶口日衆遂置州統
之以天師名故曰陵州師誓曰我所化井以養貧民若
官奪其利千年外井當陷又云項年陵井屬東川有張
常侍主鹽務於事稍怠而課不登交替後縻留不得解
去替人素崇道與虔告於天師願借神力增加所出為

其填納自是每日所煎水數如常而鹽數羨溢五六日內課足仍煎如舊數無復增矣

沈存中夢溪筆談云陵州鹽井深五百餘尺皆石也上下甚寬廣獨中間稍狹謂之杖鼓腰舊自井底用栢木為幹上出井口自木幹垂綆而下方能至水井側設大車絞之歲久井幹摧敗屢欲新之而井中陰氣襲人入者輒死無緣措手惟候天雨則陰氣隨雨而下稍可施工雨晴復止後有人作木盤蓋井上滿中貯水盤底穿

小竅灑水一如雨點謂之雨盤令水下終日不絕如此數月井幹為之一新而利復舊

文同奏避張陵名狀云臣到本州求所以得名之由據地志梁以前常為懷仁郡西魏時始改為陵州因境內有陵井故名焉陵井始後漢張陵開興因陵以名井後復因井以名州隋易為隆山郡唐改仁壽郡至乾元中復為陵州遂因仍至今矣按陵本沛人世有別傳載其異事者尤多臣不敢以聞然觀其為井之功實非常人

所能建置此州之民既賴之以為生復畏之以為神凡
過其祠廟及道其所以昔日為井之事皆慄然如肅不
敢少懈如在其上與其前後若是之恭也國家亦殊仰
其所利以贍給諸郡凡三載郊禮頒賞軍校一切皆於
此取之是所謂有功於國而有利及民者也但今以其
名配井與州而使其下負薪芻操瓢囊者無男子婦人
稚幼耆老之屬日日道其名千萬在口臣愚竊謂州取
其名於國體固無嫌若屬之斯民臣恐於義或有未安

者已臣聞晉羊祜開府南夏惠流百姓後入諱其名併改戶曹為祠曹王舒除會稽內史上言其父名會求換他郡朝議以字同音異不許舒云音雖異而字同乃特命以會為鄒授之唐陽城號卓行陽山道中有驛曰陽城元稹過其處易之為避賢孟浩然獨能詩襄陽有浩然亭鄭誠為刺史更其題曰孟亭此意皆謂賢者之名當與隱避不欲使其下常斥之也同又奏免陵州并納柴狀云臣自至當州訪問得所以為民之深害久而不

能去者惟管內仁壽等四縣百姓每歲輸陵井監煎鹽
木柴共計三十八萬四千二百餘束當時立法但以五
等人戶每稅錢上以二文一分科令納柴一束故其等
高者不下千束雖下戶亦三二十束矣其柴若常時私
下貨賣自可每束直三四十文足錢官中鄉亦以其不
易每束更支鹽六兩後來常見其虧損百姓不復支鹽
却改每束與見錢七文五分是官中大約破九文已來
貼折民下三四十文柴一束其百姓所得貼錢悉為出

旁引攬之人諸頭銷使尋亦隨手散盡又官中科配盡
須要納乾柴其百姓自入夏已來以蠶麥務忙不暇豫
先營置放令乾燥皆於二稅欲起之時若本家田內所
產乏少則須望林回買生濕雜木剪截齎擎上州赴場
送納依自來體例願以兩束折納一束是三四文一
束之柴又只得四文有餘矣加此倍之則近納七八十
萬束生濕柴也偏州小縣盡是山坡田土瘠薄別無他
產而每年於二稅送納足帛斛斗并科買紅花紫草出

助役還青苗外又復有此七八十萬束木柴之役比諸他州此方之民實被其苦臣子細體問得二三十年已前本州止有官井數處所燒柴茆若不甚費其價亦不至高大自許人開鑿卓筒之後郡下至今已及數百井故栽種林木不能供得公私採斫以至山谷童禿極望如赭縱有餘蘗纔及丈尺已為刀斧所環爭相翦伐去輸官矣臣今管見輒謂官中雖有陵井止能供得成都府一路州軍公使軍食等鹽外並無畧有所獲雖言招

召客人將絲絹展博其本監日煎鹽色皆是先已支過諸州軍每年所定合銷綱數更無贏餘見在以備客人入中臣愚欲乞朝廷特下指揮令本路轉運提刑司一就用出賣酒坊體例先為相度擘劃諸州軍公使并軍食等鹽乞不於本監支給召人買糶上件陵井監官中自可端然收納羨利臣嘗試約之除餘利可以需及買糶人外依卓筒小井課利用五分析納錢絹官中並無糜費歲可獲一萬三千八百餘足絹帛并見大錢七千二百

餘貫及免得酬與監中主當公人等一十一處場務及監內諸般銷費共一萬八百餘貫其餘外州軍盤鹽綱役酬獎尚不在其數內如此則七八十萬束之柴能害於民者盡去而五六萬貫之錢能利於國者盡得矣

川南井

華陽國志南安縣有鹽坵灘李冰所平也在漢有鹽井按今嘉州之紅崖是其故處矣寰宇記云榮州有鹽井五十七所朝野雜記云彭山有瑞應井味稍硝得隆榮

鹵餅雜煎之然後成元豐崇寧兩嘗禁止以食者多病故也
杜預益州記云益州有卓王孫井舊常於此井取水煮
鹽又火井縣西五里有靜邊鹽井皆邛州地華陽國志
孝宣帝地節中穿蒲江鹽井二十所增置鹽鈇官寰宇
記蒲江縣金釜等八井見歲出課鹽六萬三千斤東坡
志林云蜀去海遠取鹽於井陵州井最古涪井富順監
亦久矣惟邛州蒲江縣井乃祥符中民王鸞所開利人
為至厚焉雅安志州南十五里多白石鹽土人鑽取之

名曰鹽崖

華陽國志江陽縣有富義鹽井以其出鹽最多商旅輻輳言百姓得其饒富故名按此井深二百五十尺鑿石以達鹹泉口俗亦稱玉女泉也乾德四年割為富順監而縣廢管鹽井大小六歲出鹽貨三十餘萬貫勝覽云鹽井惟富順監最大舊日為額八百餘斤今日額千五百餘斤楊光清操堂記三榮富順產鹽其地號為貪泉矣富順志云富義井在縣西一里近年為淡水滲溢灶

丁淘遠近舊井賠課而此井遂廢今鹽井十四曰鄧漆園秦家富小新羅米謝家來周泉狗鳴鶴圓埧羅芹月岩溪口石欄相者是 九域志云古金川廟鹽井神也舊志在郭下井神王姓井主梅澤神梅姓本夷人晉太康初見石上出泉飲之鹹乃鑿至二百尺鹹泉湧出煎成鹽及死官為立祠祀之長寧縣消井在縣北寶屏山下古老云昔諸葛孔明登山謂此處當出一寶否則產英賢及下山見井曰此足以當之矣輿地紀勝云消井

脉有二一自對溪報恩寺山趾度溪而入嘗夜有光如
虹亂流而濟直至井所一自寶屏隨山而入謂之雌雄
水初人未知有井夷人羅氏漢人黃姓者因牧而辨其
鹹僉議刻竹為牌浮於溪流約得之者以井歸之漢人
得牌聞於官井遂為漢有後人立廟祀黃羅二神按十
州五團記羈縻十州獻其鹽池官後為消井監一統志
亦云長寧治北消井二脉一鹹一淡取以煎鹽塞其一
則皆不流謂之雌雄井矣唐貞觀五年置南通州析置

鹽泉縣以隸之王象之謂敘州近邊之地別無鹽泉意者即今長寧之境則唐初必輸官矣元歲課辦鹽三十萬斤今歲課辦鹽四十二萬五千五百斤按唐筠州下有鹽水縣者是志云筠連縣南二十五里亭臺山像若亭臺狀溪邊有鹽井即木桶井

古州劉立之通判瀘州州有鹽井蜀大姓王蒙正者請歲倍輸以自占蒙正與莊獻明肅太后連姻轉運使等皆不敢予奪君曰倍輸於國家猶秋毫耳奈何使貧民

失業遂執不與見歐陽修傳華陽國志定笮縣渡瀘水
賓剛徼白摩沙夷有鹽池積薪以齊水灌而後焚之成
鹽漢末夷皆錮之張嶷往爭夷帥岑槃木明不肯服嶷
擒而殺之厚賞餘類乃安今北沙河是也

川東井

華陽國志巴郡臨江縣枳東西百里接朐胝有鹽官在
監塗二溪一郡所仰其豪門亦家有鹽井水經注云江
水又東逕臨江縣南王莽之鹽江縣也自縣北入鹽井

溪有鹽井營戶泌注溪井水矣郡志云武隆縣距白馬
津東三十餘里江岸有鹹泉初康定間有程運使舟次
鵲岸聞江中有硫黃氣襲人謂此必有鹹泉駐舟召工
開之果得鹹脉是時兩岸薪蒸贍足民未知烹煎之法
乃於忠州遷井灶戶十餘家教以煮鹽之法未幾有四
百餘灶由是兩岸林木芟蕪童然寰宇記彭水縣東九
十里有鹽井一今煎昌元縣南北五十里井九山側亦
有鹽井

荊州圖副云八陣圖東南三里有一磧東西百步南北廣四十步磧上有鹽泉井五口寰宇記云夔州永安宮南磧上鹽井以木為桶昔常取鹽即時沙壅冬出夏沒又云諸葛鹽井有十四自山下至山上其十三井常空盛夏水漲則鹽泉逆遷去於江水之所不及東坡詩五行水本鹹安擇江與井如何不相入此意復誰省人心固難足物理偶相逞猶嫌取未多井上無閒綆荊州記云朐臝縣北岸有陽溪溪南有鹽井百二十所按陽

溪水源出雲安縣北六百里又水經注胸臆縣翼帶鹽井一百所巴川資以自給粒大者方寸中央隆起形如張傘故因名之曰傘子鹽有不成者形亦必方異於常鹽王隱晉書地道記曰入湯口四十三里有鹹石大者如升小者如拳煮之水竭而鹽成蓋蜀火井之倫水火相得乃佳矣水經注建平郡北井縣南有鹽井井在縣北故縣名北井建平一郡之所資也

宋開寶六年以夔州大昌縣鹽井鎮置大寧監治距寶

山十有七里距大昌六十九里其土多石剛裂不受陶
治官民屋宇多覆茅竹及板以瓦者無幾突小不謹輒
火飲食旋給不憂凍餒不織不耕恃鹽以易衣食按朝
野襟記大寧監寶山有洞穴鹹泉流出如瀑故老相傳
其初屬民袁氏因獵於山下逐一白鹿入洞不見得泉
飲之自後置鑊煎鹽蓋神所啓云

夔志曰袁氏遇泉雖不知始於何時然代不乏嗣有坤
貴者藏遺殘詒命三四幅一幅置制防禦使牌前

缺官

袁定立補

缺職

唐僖宗廣明年物一幅勅荆南峽中鹽

務院大昌置制所牒驅使官袁定立准勅補催遣官昭

宗乾寧年物一幅寧江軍節度安居鎮新補巡檢將袁

萬恭後蜀孟昶廣政二十四年物大寧井廟三一曰

鹽溪龍王二曰鹽水龍王三曰古祠龍王淳化中將

作監丞雷說知監事見井場人戶爭汲強弱相凌多抵

于訟乃于穴傍剏石為池以瀦水外設橫板穿三十竅

承以脩竹謂之覓筒蓋鹹泉初出勢暴不可遏故疏池

為墟而三殺之泉流既平均節入覓無復奔衝不平之患矣至嘉定中歲久弊滋事聞於朝遣榮州資官令孔嗣宗按置窮訪民瘼有不便者皆除之泉自穴入覓跨溪為渠而分之南得十三北視南加二各立長以司其平歲一易覓其法視舊益詳矣民為立祠號孔長官祠

段氏遊蜀記云通開二州有鹽漆之利宣漢長腰井場鹹源出大江龍骨窟中灘名羊門兩崖峭峻鹹源自出遂煎成鹽蒙宇記曰開縣溫湯其井有三曰栢木曰龍

馬曰杉木俱出白鹽

川北井

華陽國志巴西郡南充國縣和帝時置有鹽井蜀都賦
註充國縣有鹽井數十益州記曰南充縣西南六十里
有昆井即古鹽井也南部志縣西五十里寶馬寺有寶
井出鹽日可易一馬人共寶之故名寰宇記云新井縣
武德元年割南部晉安地置界頗有鹽井因斯立名
晉太康地記曰梓潼縣出傘子鹽九州要記云玄武縣

鹽井二近江水淡煎鹽不成飛鳥縣管井七見煎三井
餘塞寰宇云郫縣鹽井四十三眼二十二眼見煎餘廢
志云梓州舊無鹽井有僧一新者不知何代人指地教
人鑿井鹹泉湧出為利無窮及卒土人置寺奉其遺軀
為塔祀之每歲暮春鸚鵡羣飛塔上至宋猶然

寰宇云涪城縣管鹽井五十五所十眼煎餘塞又云富
國監者本梓州郫縣富國鎮新井煎鹽之場也宋置監
以董其事兼領通井飛鳥等井地去梓州九十里又云

通泉縣管鹽井七十四所

蜀記云靈江東鹽亭井古方安縣也周地圖記梁大同元年於此立亭因井名縣管鹽井三煎一有女徒山在縣東二十五里從閬州新井縣界來故老相傳昔有女徒千人於通泉縣康督井配役遇賊於此乃於山頂置柵禦捍遂破賊俗為之置祠今富順鹽井皆婦人推車汲水由此而論則女徒之山可錄矣寰宇記東關縣管鹽井四見煎三井餘廢永泰縣管鹽井五

蓬溪志云常鐵冠不知何許人天聖間寓蓬溪赤城山縣東五里有鹽井或鹹水短少井民勾氏以告常曰此一蝦蟆作祟塞水眼耳即為出儀文三卷醮之其水如血者累日鹹源復通後用其儀文禱井屢驗

井課

杜氏通典云蜀道陵綿等十州鹽井總九十所每年課鹽都當錢八千五十八貫註云陵州鹽井一所課都當錢二千六十一貫綿州井四所都當錢二百九十二貫

資州井二十八所都當錢一千八十三貫瀘州井五所
都當錢一千八百五十貫榮州井十三所都當錢四百
貫梓州都當錢七百一十七貫遂州四百一十五貫閬
州一千七百貫普州二百七貫果州二十六貫

圖經云唐萬歲通天二年右補闕郭文簡奏陵井監賣
水一日夜得四十五函半百姓貪利失業長安二年停
賣水依舊稅鹽先天二年加課利歲有三千六百二貫偽
蜀時井塞宋乾德三年平蜀陵州通判賈璉重開舊井

一晝夜汲水七十五函每函煎鹽四十斤日獲三千斤
至雍熙元年春冬日收三千八百一十七斤秋夏日收
三千四百四十七斤蓋水源之有長短也

朝野雜記仙井歲產鹽二百餘萬斤隸轉運司蒲江亞
之隸總領所大寧監二百五十餘萬斤歲取其四分隸
總領所涪井鹽四十餘萬斤歲取其贏五萬餘緡為軍
食之用自祖宗以來民間自煮鹽歲輸課利錢八十萬
緡趙應祥變鹽法增至四百餘萬緡又逃絕之井許人

增其額以承認鹽既益多遂不可售紹熙三年楊嗣勲
總計棧閣助筒二千鹽由是頓易自後井戶稍紓而民
間食鹽愈貴矣

太平興國初有司言昌州鹽歲收虛額十一萬八千五百
餘斤及開寶中知州李佩率意倍歛以希課最於歲額
外別役部民煮鹽民甚以為苦轉運使以聞詔悉除之
夔府舊志昔大寧鹽井隸監淳熙甲辰部使者楊公輔
更法歸之漕司監不復與熙寧中歲額四百餘萬斤紹

興中以二百四十萬斤為額閏年加十萬斤為二百五十萬斤

宋史熙寧中蜀鹽私販者衆禁不能止欲盡實私井運解池鹽以足之議未決神宗以問修起居注沈括對曰私井既容其樸買則不得無私易一切實之而運解池鹽使一出於官售此亦省刑罰籠遺利之一端然忠萬戎瀘間夷界小井尤多止之實難若列堠加警恐所得不酬所費議遂寢按括本傳云市易司患蜀鹽不禁欲盡實私井而輦解池鹽給之言者論二事如織皆不省

沈括侍側帝顧曰卿知籍車乎曰知之帝曰何如對曰
敢問欲何用帝曰北邊以馬取勝非車不足以當之括
曰古人所謂兵車者輕車也五御折旋利於速今民間
輜車重大日不能三十里世謂之太平車但可施於無
事之日爾帝曰人言無及此者遂問蜀鹽事對曰臣恐
得不足償費帝頷之明日二事俱寢

井法

類要云鹽泉有絞筴引泉踏溪每一窰用一筴其窰與

洪每年十月旦日以新易陳郡守作樂臨之井民相慶
謂之絞筵節

志林云慶歷皇祐以來蜀始開筒井用園刃鑿如盆大
深者數十丈以巨竹去節牝牡相銜為井以隔橫入淡
水則鹹泉自上又以竹之差小者出入井中為桶無底
而竅其上懸熟皮數寸出入水中氣自呼吸而啓閉之
一筒可致水數斗凡筒井皆用機械利之所在人無不
知後漢書有水韞此法唯蜀中鐵冶用之大畧似鹽井

取水筒太子賢不識妄以意解非也 近時射洪士人馬驥謨鹽井圖說云鹽井其來舊矣先世嘗為皮袋井圍徑三五尺許底有大塘利饒課重工力浩鉅非一載弗克竣今皆湮沒殆盡不可考民循故業以納課率多從竹井制其施為次第在井匠董之凡匠氏相井地多於兩河夾岸山形險急得沙勢處鳩工立石圈盡去面上浮土不計丈尺以見堅石為度而鑿大小竅焉大竅大鐵釭主之小竅小鐵釭主之釭一也大釭則有釭頭

扁竟七寸有輪鋒利穿鑿興井日北口傍樹兩木橫一木於上有小木滾子以火掌繩釭末附於橫木滾子上離井六七步為一木椿糾火掌篾而耦舂之滾竹運釭自上下相乘矣匠氏掌釭篾坐井口傍週遭圓轉令其竅圓直初則灌水鑿之及二三丈許泉蒙四出不用客水無論上石釭觸處俱為泥水每鑿一二尺匠氏命起釭用筒竹一根約丈餘通節以繩繫其梢筒末為皮錢掩其底至泥水所在匠氏揉繩伸縮皮散水入挹滿攪

出泥水漸盡復下鉗鑿焉次第䟽鑿不計功程力大較至二三十丈許見紅石岩口大竅告成矣隨議下竹竹有木竹樺竹二種木竹取堅也剝木二片以麻合其縫以油灰釁其隙樺竹出馬湖山中亦以麻裹之木竹末為大麻頭纍纍節合下盡全竹四潰淡水障阻不能浸淫迺截去大鉗頭用鉗梢鑿小竅法如大竅然鑿至二十丈中見白沙數丈有鹹水數担名曰腰脉水去鹹水不遠尋鑿之而鹹水淵涓自見也水有廣水晝夜力汲

不竭然味近淡有鹹水晝夜計有數然味亦不齊有一担而煮鹽五六斤者有八九斤至十二三斤者顧遇何如耳厥工既就始樹樓架高可似敵樓上為天滾有轆轤聲制筒索吸水如前吸泥水法而樞軸則管於車床也床橫木為槃槃有兩耳作曲池狀左右低昂逆施左揖地右伸右揖地左伸循環用力索盡筒出鹹水就灰芭潑水而煎燒有緒矣轉轆轤者蓋三人為之力厚者則制牛車車狀大力逸而功倍也此自成井而論耳若掘

鑿之際釭偶中折而墜其中者或遭淤泥作阻者其出
法亦巧而為器亦異釭帶火掌篋而墮者以攪鍊鉤出
為力易易惟釭半墮或止墮釭頭者取之之法制為鐵
五爪如覆手狀爪背入木數寸以竹三尺許劈碎一尺
纏扼爪木令堅緻上一尺亦劈碎則活繫撞子釭不令
拘泥偏向中一尺通其節以待撞子釭假道撻伐垂爪
入井爪定所墮釭頭匠氏從上督索撞子釭由筒中擊
木木擊五爪數擊則爪攬剝釭頭者牢不可以游滑自

匿雖欲不出不可得矣若被淤泥填溢大小竅猶闕格
症然甚者製為搜子以和解其膠密搜子者鐵條之有
啣齒者也未甚者製為漕釵以衝擊其脂凝漕釵者撞
子釵之有啣齒者也支解既析則為刮筒以取其泥刮
筒之制與鹽筒殊科不通其節而每節之始鑿為方口
投井中吸泥亦如汲水式蓋水可以疏通翕受泥則踰
節不可是則匠氏作法意也嗟乎一井之成其次第節
目如此亦云勞矣乃勞歸灶丁利歸商販富灶任逸傭

灶任力終歲窮日疲竭若何而徵輸又告急矣至有坍塌而乾賠國課者有逋負而逃徙流離者是在上之人寬一分則民受一分之賜云

火井油井

蜀都賦云火井沉熒于幽泉高焰飛煽于天垂王逸少與周益州書彼鹽井火井皆有否足下目見不為欲廣異聞異苑云蜀郡臨邛縣有火井漢室之隆則炎赫彌熾暨桓靈之際火勢漸微諸葛亮一瞰而更盛矣

博物志云臨邛火井一所從廣五尺深二三丈在縣南
百里十道要記云火井有水郡人以竹筒盛之照路接
其光而無炭常璩云蜀郡臨邛縣有布濮水從布濮來
合火井江有火井夜時光映上昭民欲其火光以家火
投之頃許如雷聲火焰出通耀數十里以竹筒盛其光
藏之可拽行終日不滅也井有二水取井火煮之一斛
水得五斗鹽家火煮之得無幾也

方輿云長江縣火井在客館鎮之北二里伏龍山下地

窪若池以火引之則有聲隱隱然發於池中少頃熾炎
夏月積雨停水則焰生水上火為之沸而寒如故水涸
則土上有焰觀者至焚其衣裾

蓬池火井在縣西南三十里水涸時投火其中焰從地
出移時方滅若掘深一二丈頗有水出

陸游跋火池碑云予昔在征西幙府嘗得小校言火山
軍池枯燥不可鉏犂及地不及尺烈火隨出今江吳間
穿地尺餘則見水北人聞之亦未必信也夜讀蜀彭君

火井碑乃知天地間何所不有亦喜彭君之善記事也
嘉泰壬戌閏月十有五日

通志云國朝正德末年嘉州開鹽井偶得油水可以照
夜其光加倍沃之以水則焰彌甚撲之以灰則滅作雄
硫氣土人呼為雄黃油亦曰硫黃油近復開出數井官
司主之此是石油但出於井爾蓋由與產雄硫石脂諸
處源脉相通故有此物益部談資油井嘉眉青神井研
洪雅犍為諸縣有之居人皆用以燃燈官長夜行則以

竹筒貯而當炬一筒可行數里價減常油之半而光明
無異 予以辛亥齋捧過捷為得并油少許令人試之
信然但其性暴烈不可嚮邇傳火之時稍不及避則焚
其手因為匡廬僧持去以廣山中聞見

蜀中廣記卷六十六

欽定四庫全書

蜀中廣記卷六十七

明 曹學佺 撰

方物記第九

玉石

山海經曰岷山江水出焉其下多白珉註珉似玉而非
次玉者也子虛賦蜀石黃璫張揖曰蜀石石之次玉者

竹書紀年曰夷王變二年辛丑蜀人來獻瓊玉賓於河

用介珪太平御覽云西蜀出黑玉

王子年拾遺記蜀先主琢玉人置甘后側玩之宮人妬后亦妬玉人

雋州志云西海中產水晶石人至其傍喧語則雷電興焉

本草經曰嘉州峩眉山出菩薩石色瑩白明徹若泰山狼牙上饒水晶之類日中照之有五色如佛頂圓光俗以菩薩光明所感

酉陽雜俎蜀石笋街夏中大雨往往得雜色小珠俗謂
地當海眼莫知其故蜀僧惠嶷曰前史說蜀少城飾以
金璧珠翠桓溫惡其太多焚之合在此今拾得小珠時
有孔者得非是乎

蜀紀周大夫萇弘死蜀人藏其血三年變為碧珠

隋書史萬歲伐南寧夷爨翫請降獻明珠徑寸

大足志縣南二十里寶珠溪貞觀時漁人郭福夜見水
際有光即之有蚌如斗剖得徑寸明珠以獻太宗賜之

積善井碑碣猶存

五金

漢宣帝遣王褒持節祀蜀碧金馬顏師古注曰金形似馬碧形似鷄也陶弘景別錄云金屑生於益州華陽國志新都縣金堂山水通巴漢出金沙蜀記曰金堂縣古有金船沉江之東岸往往有見者按本志舊懷州前有潭是名金淵唐諱為金水也郡國志云廣漢有金山縣縣東一水瀨時有金碎珠隨波東注傍水居人採以

為業李膺益州記云金山在涪縣東長七八里每夏淹水有崩處即金粟散出華陽國志云涪縣有孱水出孱山其源有金銀礦洗取火融合之為金銀按涪縣孱亭今之左綿及屬縣地

李膺記云走金山在導江縣堯時洪水民奔是山而獲金故名宋史慶厯中或言彭之廣碕麗水二峽出金宦者挾富人請置場募採益州轉運使高覲以聚眾山谷間與夷獠雜處非地方之福且得不償失遂罷之龍州

志云州產金砂在西北九十里水進站界亦隣于夷
山海經崂山其陽多黃金寰宇記浮圖水在蘆山縣五
里從生羌界來水中有孤崖狀如浮圖出貢金又云大
渡河一名沫水出楚金所謂漢嘉金也

鹽井志衛西三十里有廢金縣元之金州也界有斛隄
和山出金故名西北四百五十里刺紅瓦山下有金縣
五村香羅八瓦山寨產金成粒與雲南麗江府接界土
官刺馬仁所管又有刺雀瓦山產碎金革石瓦山產銀

礦寧番志瀘沽橋去衛南八十里其水與長汀水交流而下注金沙江是滇蜀爭界處

常璩曰晉壽縣本葭萌城有金銀礦民今歲歲取洗之梁州記曰益昌縣東山西北有金銅谿出金

方勺泊宅編云黃銀出蜀中色與金無異但上石則色白

南中八部志朱提山在犍為屬國舊有銀窟數處諸葛亮書朱提銀采之不足以自食韓愈詩我有雙飲醖其銀得朱提是也漢志朱提銀以八兩為一流流直十五

百八十他銀一流直千

續博物志後唐同光中莊宗平蜀得王衍金銀命悉鎔之為金塼銀塼約重三百斤一塼開一竅二人擔之上有匠人名曰馮高過荆南高季興曰馮高主屬我坑官吏持而有之儲為一庫建隆中沒入京師斤兩封緘如故

宋張詠在蜀日有術士上謁自言能煨汞為白金張曰若能一火煨百兩乎曰能即市汞百兩俾鍛一火而成不耗銖兩張歎曰若術至矣然此物不可用於私家立

命工鑄為一香爐鑿其腹曰充大慈殿上用尋送寺中以酒榼遺術者而謝絕之

禹貢曰梁州厥貢璆鐵銀鏤鐵柔鐵鏤剛鐵也史記曰蜀卓氏之先趙人用鐵冶富秦破趙遷卓氏求遠致臨邛大喜即鐵山鼓鑄運籌策富至僮千人田池射獵之樂擬於人君程鄭山東人亦以冶鑄富埒卓氏俱居臨邛華陽國志云臨邛縣古石山有石鑛大如蒜子火燒合之成流支鐵甚剛因置鐵官有鐵祖祠

寰宇記宕渠郡之鉄官永川縣之鉄山鄰水縣之隣山
銅梁縣之綿谷俱出鐵

雲笈七籤云欲合鉄屑丹者必先辨鉄性擇其善者用
之古方多以雅州百丈建州東瞿為上陵州都盧為次
并州五生為下又梓柯及廣柳二州所出並不煩灌鍊
即堪打用此蓋自然剛也嘉陵榮資四州所出功力與
廣邾相似而灌剛之時須得百丈者相參乃堪服用若
忠渝等州所出並力薄不堪

老學菴筆記云蜀有竹炭燒巨竹為之易然無煙而耐久
邛州出鐵烹鍊利於竹炭皆用牛車載以入城予親見之

寰宇記羊角山出錫在劍州南九十里兩峰崛起如角
然地鏡圖云草青莖赤其下多鉛鉛錫之精為老婦人

唐獨孤滔云嘉州利州出草節鉛生鉛未煅者也打破
脆燒之氣如硫黃紫背鉛即熟鉛鉛之精華也有變化
能碎金剛鑽本草雅州出釣脚鉛形如皂子又如蝌蚪

子黑色生山澗沙中可以乾汞

梁簡文金鐔賦云采赤塗於蜀壘求銅精於灌瀆異苑云魏時殿前鐘大鳴衆皆震駭張華云此蜀銅山毀故鐘鳴應之蜀都尋上其事如華言

華陽國志會無縣天馬河中有銅胎以羊祀之可取河中見存按水經注會無縣駿馬河中謂之貝子胎銅矣

十道記云廣漢之地有銅山之富寰宇記銅山縣本蜀道銅山鄧通鑄錢處也又有私鎔可蒙賴應三山皆出

銅任百姓採鑄即今中江縣地

錢

說文錢者泉也言如泉之流布也以銅鑄鑄之蜀有銅
官鉄官故泉貨為盛括地志曰雅州榮經北三里有銅
山即漢文賜鄧通處榮經縣即嚴道矣佞倖傳曰鄧通
蜀郡南安人也以擢舡為黃頭郎文帝常夢欲上天不
能有黃頭郎推上天顧見其衣尻帶後穿覺而之漸臺
以夢中陰自求推者郎見鄧通其衣後穿夢中所見也

召問其名姓即鄧通鄧猶登也文帝甚說尊幸之使善相人者相通曰當貧餓死上曰能富通者在我何說貧於是賜通蜀嚴道銅山得自鑄錢鄧氏錢布天下其富如此文帝崩景帝立鄧通免家居無何人有告通盜出徼外鑄錢下吏驗問頗有遂竟案盡沒入之通家尚負責數鉅萬長公主賜鄧通吏輒隨沒入之一簪不得著身於是長公主乃令假衣食竟不得名一錢寄死人家李孝美錢譜云鄧通錢文字稱兩同漢四銖文

華陽國志云漢文帝以銅山賜侍郎鄧通通假民卓王
孫歲取千足邛志云州治南五里卓王孫故宅即舊臨
邛縣也耕者往往於其地得漢錢昔文君白頭吟云男
兒重意氣何用錢刀為

方輿勝覽成都通仙井在嚴真觀相傳此井與綿竹縣
君平井相通往歲有人淘井得銅錢三徑可二寸因恍
惚不安復投井中立愈或謂是君平擲卦錢岑參詩君
平曾賣卜卜肆蕪已久至今杖頭錢時時地上有

封演錢譜漢有厭勝錢藕心錢狀如千盾長且方而不圓蓋古刀布之變也與近世花莖夫人封綬及穿鑰錢相似

陳壽蜀志劉先主收成都士衆掠盡府庫財貨軍用不足憂之劉巴子初曰鑄直百錢平物價令吏為官市從之數月而充足梁崔祖思政事疏曰昭烈取帳鉤銅鑄錢以充國用

蜀志補云墓頤山鹿市洞穴中有遊者得鵝眼錢不知

從來按宋畧一貫長三寸謂之鵝眼錢言薄而小泰始中沈慶中啓通私鑄所作也

五代史李昊曰蜀主於劔門夔峽多積芻粟增置師旅用度不足遂鑄鉄錢禁境內鐵置場鬻之以專其利

成都文類曰宋真宗景德中詔謝濤巡撫利益同九河張詠議鼓鑄利害乃考鐵價制錢幣重輕適均物估用平衆甚便之

元費著錢幣譜曰蜀古用銅錢漢文帝時賜鄧通蜀嚴

道銅山鑄錢是也公孫述據蜀始廢銅錢置鐵官錢百姓貨幣不行其謠曰黃牛白腹五銖當復好事者竊言王莽稱黃述稱白五銖漢貨言天下當還劉氏也後述雖減猶用鐵錢以二當銅錢一先主攻劉璋拔成都士卒皆赴庫藏取寶貨軍用不足乃鑄錢一當百平諸物價文曰直百南齊永明八年劉悛啓武帝曰蒙山故嚴道地有古銅坑可以經畧帝從之遣使入蜀鑄錢得千萬工費多乃止後周有蜀雜用古錢交易隋文帝時詔

蜀王秀於益州立五鑪鑄錢字文輕重如開通元寶之制五代王衍末年改元咸康又鑄咸康錢然不及唐舊錢遠甚孟氏廣政間增鑄鉄錢於外郡邊界參用每錢十分四百為銅六百為鉄逮至末年流入成都率銅錢十分雜鉄錢一分大盈庫往往有鉄錢與銅錢相混莫辨蓋鑄工精也孟昶失國乾德四年知府呂公餘慶轉運使沈公義倫奏揀銅錢計綱以發蜀地上行鉄錢以千一百易銅錢千又索銅器鑄錢附發仍增鑄銅錢市

金上供然失於裁制物價滋長鉄錢彌賤至以五千易銅錢一千太平興國四年詔兩稅及諸課利錢率十分輸銅錢一分時舊錢已竭民間騷擾北客乘時販銅錢入蜀以一錢易鉄錢十四至有因銅錢三五毀發古塚剔取神像犯刑者朝廷察知詔仍舊止輸鉄錢人心乃安淳化五年詔兩川以銅鉄錢兼行銅錢一當鉄錢十民頗便之咸平三年西京左藏庫使楊允恭言川陝民田之稅昔輸銅錢一今亦鉄錢一吏卒俸給舊銅錢一

今鉄錢五若交易則鉄錢十為銅錢一旦饒信之銅積
數千萬若舟運自荆達蜀蜀素多銅俾變益遂各置監
鼓鑄歲用均給不及十年可悉用銅錢矣議雖未行然
自是吏卒俸給改用十小鉄錢之一矣景德二年張公
詠上言受詔與轉運使黃觀同裁度嘉邛二州所鑄景
德元寶大錢十一參用甚便從之三年行用新鑄銅錢
初益邛嘉眉等州歲鑄鉄錢五十餘萬貫同兩稅課利
收市物帛上供因李順亂罷鑄僅十年又以兵火耗壞

至是鑄大錢民以為利大中祥符七年諫議凌公策等請鑄大鉄錢每貫重一十二斤十兩以一當十先是蜀中小鉄錢每十當一貿易非便其後別鑄大錢貫重二十五斤每一當小錢十三司言民有盜鎔大錢一千範為器用鬻錢二千故盜鎔者衆策言錢輕則行者易賒鉄少則鎔者鮮利故請改鑄也嘉祐中趙公抃任轉使以蜀錢甚多嘉州歲科衙前以鉄科民以炭頗為擾奏乞罷鑄十年以寬民力四年裕享赦書許之熙寧六

年五月轉運司以嘉卅州罷鑄錢久民間闕錢乞減半鑄與錢引相權從之建炎二年轉運司以鑄錢數多難於流轉造引數少其價益高奏乞依嘉祐四年赦文權罷鑄錢十年椿留鼓鑄本錢稱提引價不待報遂行自是引日益多錢日益銷議者以為恐非經久相權之制紹興三十一年臣僚奏請復置嘉卅二監鼓鑄夾錫錢詔下制置司總領所商權乃具奏以謂嘉州所用錢係撥於眉州鉄場其數不多難以復置錢監止就卅州置

監鼓鑄經久可行利州紹興監仍歲鑄大小錢共九萬貫尋報可遂以邛州歲鑄折二錢一萬貫小錢一萬貫總領所給其費淳熙六年總領李昌圖奏利邛州兩監所鑄錢官費本錢倍於息且鼓鑄有限而民間鈔銷無窮若不更革錢重引輕必壞引法乞罷鑄兩監折一小錢比折二錢稍增銖兩改鑄折三大錢及將崇寧大觀折二大錢並作折三行使詔從其請逮今行之以為利焉

交子

元費著曰蜀民以錢重難於轉輸始製楮為券表裏印
記隱密題號朱墨間錯私自參驗書緡錢之數以便貿
易謂之交子凡遇出納季一貫取三十錢為息其後富
民十六戶主之尋亦貲衰不能相償爭訟數起大中祥
符末薛公田為轉運使請官置交子務以權其出入不
報寇公瑊守蜀乞廢交子不用會瑊去而田代之詔田
與轉運使張若谷度其利害田若谷議以廢交子為非
便請為置務禁民私造條奏甚悉又詔梓州路提刑王

繼明與田若谷共議田等議如初詔從之始置益州交子務時天聖元年十一月也自二年二月為始至三年二月終凡為交子一百二十五萬六千三百四十貫其後每界視此數為準交子舊以二月二十日起界清獻公為記時已遷至七月也熙寧五年續添造一界其數如前作兩界行使從監官戴蒙之請也每道初為錢一貫至十貫寶元二年以十分為率其八分每道為錢十貫其二分每道五貫若一貫至四貫六貫至九貫更不

書放熙寧元年始以六分書造一貫四分書造五百重
輕相權易於流轉於是蒙又請置抄紙院以革偽造之
弊引有兩界與官自抄紙皆自蒙始大觀元年五月改
交子務為錢引務所鑄印凡六曰勅字曰大料例曰年
限曰背印皆以墨曰青面以藍曰紅團以朱六印皆飾
以花紋紅團背印則以故事監官一員元豐元年增一
員掌典十人貼書六十九人印匠八十一人雕匠六人
鑄匠六人雜役一十二人廩給各有差所用之紙初自

置場以交子務官兼領後慮其有弊以它官董其事隆興元年始特置官一員莅之移寓城西淨衆寺紹熙五年始創抄紙場于寺之旁迄官治其中抄匠六十一人雜役三十人凡引一界滿納舊易新率千引取錢四十曰貫頭錢天聖初止三十建炎初增八紹興十一年乃增令數其納換不盡者曰水火不到錢今一界所收併貫頭錢凡一百九十萬道總領所權取以供軍儲所印之數自元豐元年兼放兩界之後紹聖元年增一十

五萬道元符元年增四十八萬道祖額每界以一百八十八萬六千三百四十為額以交子入陝西轉用故也崇寧間用兵陝西開拓境土通行引法以助兵費元年增二百萬二年增一千二百四十三萬五千四年增五百七萬五千大觀元年增五百五十四萬五千六百六十六比至換界以新引一當舊引四引法大壞尋有詔自四十一界至四十三界更不許換四十四界止依天聖舊額仍不得越銅錢界建炎二年罷鑄錢復用元符

所增之額三年增一百萬紹興元年增六十萬二年增一百四十萬三年增五百萬四年增五百七十萬五年增二百萬六年增六百萬皆以給利變兩路軍費七年有旨不許泛印八年以邊報急闕增三百萬充糴買九年以移屯陝西合給糴本及陝西六路新復州軍衣賜增二百萬增數既多簽書樞密院事樓照奉使陝西奏禁泛料始定著刑章十年以贍軍急闕增五百萬十二年以都運司之請增四百萬二十九年以增招軍兵椿

辦犒賞總領所請增一百七十萬詔從之自後累增五百餘萬凡兩界共為錢引四千六百四十七萬二千六百八十紹熙二年有旨將八十三界錢引展一界行使增印一百九十萬以償總領所兌引貫頭水火不到錢之數慶元三年總領所奏以成都潼川利州三路旱傷制置司減免民間租賦乞增印錢引以備對補有餘以充賑濟詔增一百萬逮今合四千九百三十七萬二千六百八十道矣而又偽造竊行足以亂真引日益增錢日

益銷子母不能相權然有稱提之法以錢稱提者引價
低則官為出藏鋸增價與民市引是也以法稱提者凡
民以錢輸官當折引則以一貫二百八十為限是也蓋
有錢則有引天聖所印之數視錢以為準者也自軍興
增料鑿空為錢天下大計仰給於紙猶幸守和議引之
出納有常半藏諸司之庫半流轉於民維持不壞識者
有憂其在軍旅之際乎

按宋史薛田為益州路轉運使民間以鐵錢重私為券

以便交易謂之交子而富家專之數致爭訟田請置交
子務以權其出入未報及寇城守益州卒奏用其議蜀
人便之又云會子交子之法蓋有取於唐之飛錢真宗
時張詠鎮蜀患蜀人鐵錢重不便貿易設質劑之法一
交一緡以三年為一界而換之六十五年為二十二界
謂之交子初主以富民及貲衰不能償所負爭訟不息
仁宗時置益州交子務以權其出入私造者禁之定以
百二十五萬六千三百四十緡為額云

父子式

界年

分號

貼

頭

五

行

料

例

勅

字

花

紋

印

青

面

花

紋

印

紅

團

故

事

印

年

限

花

紋

印

一

貫

故

事

背

印

五

百

故

事

背

印

書放額數

第七十界

辛	己	紹	興	三	十	一	年
至	富	國	財	并			
金	雞	捧	勅				
合	歡	萬	歲	藤			
龍	龜	負	圖	書			
三	耳	卣	龍	文			
吳	隱	之	酌	貪	泉	賦	詩
王	祥	孝	感	躍	鯉	飛	雀

書放錢引二千三

百七十三萬六千

二百四十貫文

癸利慶攀寶上天皮	第七未足	隆以	興	元生	年民日男物花極壁
書放錢引二千二百	雲枝鼎	太來薦七十三萬六千三百	捧百圖	平西珪四十貫文	

第七十二界			
乙	酉	乾	道元
强	本	而	節
金	花	捧	勅
蜃	樓	去	滄
朽	粟	紅	腐
堯	堦	冥	莢
漢	循	吏	賜
卜	式	上	家
		書	獻

書放錢引二千三百

七十三萬六千三百

四十貫文

第七十三界

丁亥	乾道	三	年
舊	法	為	便
雙	龍	捧	勅
方	圓	錦	地
孟	膏	還	珠
六	入	毬	路
子	罕	辭	寶
青	錢	學	士

書放錢引二千二百

七十三萬六千三百

四十貫文

年	五	道	乾	丑	己
源	之	貨	序		事
夔	右	臯	左	勅	捧
枝	荔	果	衆	超	逸
軍	三	揮	指	扇	羽
榴		石		葉	
械	器	備	馬	車	修
羽		千		舞	

四十貫文

百七十三萬六千

書放錢引二千三

第十七界

辛卯乾道七年

善治立經常

勅 捧 重 九

川心龜紋玉連環

王惠梁見子孟

意如累累

修惟穀土木金火水書

唐太宗時戶外不閉斗米三錢

書放錢引一千二

百七十三萬六千

三百四十貫文

第七十六界

年九道乾已癸

長舒日國化

勅捧龍雙

花草黃牙龍

原中清誓楫擊流中逃祖

花平太合百

風南歌以琴之絃五作舜

王文歸老二公太夷伯

書放錢引二千三

百七十三萬六千三

百四十貫文

第七十七界

乙	未	淳	熙	二	年
維	幣	通	農		商
盤	龍		捧		勅
魚	躍		龍		門
同	律	度	量	衡	
連	環	萬	歲	藤	
武	侯	牛	流	運	
傳	說	木	馬	築	

書放錢引二千二百

七十二萬六千三

百四十貫文

分		界			
號		年			
例	料	行	五	頭	貼
印	紋	花		字	勅
印	紋	花		面	青
印	事	故		團	紅
印	紋	花		限	年
印	背	事	故	貫	一
印	背	事	故	百	五

書放額數

第十七卷

己亥淳熙六年

國以義為

金吾枝玉葉

金堯舜垂枝

纓周宣德裕

李

樓

書放引二千二百

七十三萬六千三百四十貫文

錦

宋東陽沈立撰錦譜一卷見宋史經籍志今不存所存者元費著譜耳其畧云蜀以錦擅名天下故城名錦官江名濯錦而蜀都賦云貝錦斐成濯色江波遊蜀記云成都九壁村出美錦歲充貢宋朝歲輸上供等錦帛轉運司給其費而府掌其事元豐六年呂汲公大防始建錦院於府治之東募軍匠五百人縫造置官以涖之創樓於前以為積藏待發之所榜曰錦官公又為之記

其畧云設機百五十四日用挽綜之工百六十四用杼之工五十四練染之工十一紡繹之工百一十而後足役歲費絲權以兩者一十二萬五千紅藍紫蒨之類以斤者二十一萬一千而後足用織室吏舍出納之府為屋百一十七間而後足居自今考之當時所織之錦其別有四曰土貢錦曰官告錦曰臣僚襖子錦曰廣西錦總為六百九十足而已渡江以後外攘之務十倍承平建炎三年都大茶馬司始織造錦絳被褥折支黎州等

處馬價自是私販之禁興又以應天北禪鹿苑寺三處
置場織造其錦自真紅被褥而下凡十餘品於是中國
織紋之工轉而衣被推髻馭舌之人矣乾道四年又以
三場散漫遂即舊廉訪司潔已堂剏錦院悉聚機戶其
中猶恐私販不能盡禁也則倚宣撫之力建請于朝併
府治錦院為一俾所隸工匠各以色額織造蓋馬政既
重則織造益多費用益夥隄防益密其勢然也今取承
平時錦院與今茶司錦院所織錦名色著于篇俾來者

各以時考之

轉運司錦院織錦名色

即成都府錦院

土貢錦三足花樣俱八荅暈

官告錦四百足花樣曰盤球曰簇四金鵬曰葵花曰八荅暈曰六荅暈曰翠池獅子曰天下樂曰雲雁

臣僚襖子錦八十七足花樣則簇四金鵬八荅暈天下樂三種

廣西錦二百足花樣真紅百足曰大窠獅子曰大馬打

毬曰雙窠雲雁曰宜男百花青綠百足曰宜男百花曰
青雲雁曰綠雲雁

茶馬司錦院織錦名色本司須知云逐年番蠻貢到
馬數多寡以用折傳別無一定之數

黎州皂緋二種大被皂緋四色三種中被七八行錦瑪
瑙錦

敘州大被褥雙連椅背單椅背俱真紅

南平軍真紅皂青三種大被褥真紅雙窠錦

文州搞設紅錦

細色錦名色

曰瑞草雲鶴曰如意牡丹俱青綠曰鶯黃水林檎曰紫
皐段子此二種特色曰宜男百花曰穿花鳳曰雪花毬
露曰櫻桃曰水林檎曰天馬曰飛魚曰聚八仙曰六金
魚曰秦州細法曰秦州中法曰秦州麤法曰湖州大百
花孔雀曰四色湖州花孔雀曰二色湖州大百花孔雀俱紅

譙周益州志云成都織錦既成濯於江水其文分明勝

於初成他水濯之不如李膺益州記曰錦城在笮橋東
流江南岸昔蜀時錦宮也號錦里城墉猶在茲問錦於
蜀中江城宛然如故而杼軸已不存矣

書顧命篇肩之舞衣註肩諸侯國所製之舞衣也按宋
利州平蜀縣即古肩山縣丹鉛錄謂舞衣即今川錦此
亦茫昧難據然西京雜記云漢成帝趙皇后報趙婕妤
以雲錦五色帳沉水香玉壺婕妤泣怨帝曰非姊賜我
死不知此器帝謝之詔益州留三年輸為婕妤作七成

錦帳以沉水香飾之則蜀錦實見於漢也山謙之丹陽記曰歷代尚未有錦而成都獨稱妙故三國時魏吳皆資於西蜀至是始乃有之環氏吳記曰蜀遣使吳齎重錦千端魏文帝賜羣臣曰前後每得蜀錦殊不相似左慈傳云慈嘗在司空曹操坐釣松江鱸魚操謂曰既已得魚恨無蜀中生薑耳慈曰可得也操恐其即近所取因曰吾前遣人到蜀買錦可過勅使者增市二端語頃即得薑還并獲操使報命後操使蜀反驗問增錦之狀及時

日早晚若符契焉蜀志曰先主平益州賜諸葛亮法正
關張諸公錦各千疋諸葛軍令云軍中之需全藉於錦
華陽國志諸葛孔明既圖畫以賜南夷又與之瑞錦鉄
券是在三國時而錦駸駸始盛矣

唐宋之世額有常輸而奇袤者或侈勝或報罷存乎其
人如蘇頲以開元八年知益州大都督府長史事前司
馬皇甫恂破庫物織新樣錦以進頲至一切罷之故唐
書云元宗令皇甫恂於益州織半臂背子等蘇頲為太

守不奉詔書乃停者也又云安樂公主出降武延秀蜀
川獻單絲碧羅籠裙縷金為花鳥細如絲髮烏子大僅
黍米眼鼻嘴甲俱成明目者方見之又韋臯在西川凡
軍士將吏有婚家則以熟錦衣給其夫氏以銀泥衣給
其女氏宋初川峽諸州貢織綺鹿胎透背六銖歌正龜
殼等太平興國七年詔悉罷之天聖六年春又罷兩川
乾元節歲貢織佛明道中又累詔減兩蜀歲輸綿綺此
其大較也

予得諸名流之賦詠者西京雜記相如友人盛覽字長
通畔柯名士也嘗問作賦法相如曰合綦組以成文列
錦繡而為質一經一緯一宮一商此賦之迹也覽退而
作列錦賦合組歌揚雄蜀都賦云爾乃其人自造奇錦
紃緼緼頡繆緣盧中發文揚采轉代無窮左思蜀都賦
曰闐闐之裏技巧之家百室離房機杼相和貝錦斐成
濯色江波唐張何蜀江春日文君濯錦賦云粵惟姑洗
應律勾芒御辰雁橋風暖犀浦花新疊嶂縈郭長楊映

津軒車照地士女驚人風土堪樂山川可珍歲時不殊
於荆楚形勝有類夫咸秦晚景彌秀晴江轉春即有卓
氏名姝相如麗室織迴文之重錦艷傾國之妖質鳴梭
靜夜促杼春日布葉宜疎安花巧密寫庭葵而不欠擬
山鳥而能悉績縷嫌遲嘖蛾慕疾乍離披而成段或煥
爛而成足言濯春流鳴環乃出於是近深沉傍清泚朱
顏始映珎篋方啓其始入也疑芳樹影落澗中少將安
焉若晴霞色照潭底奪五雲長風未散泣百花微雨新

洗爾乃曝林崖出泉洞遲日徐轉和風緩送稍變迴鸞
全分舞鳳戲蝶時遶嬌鶯欲弄乘春景而方收俟王正
而入貢懿其彩色足重鮮明可嘉青為禁柳紅作宮花
能使御尉榮障夫人飭車郎官居而列宿郡守衣而還
家豈若夫齊紈之與楚練細縠之與輕紗王建織錦曲
云大女身為織錦戶名在縣官供進簿長頭起樣呈作
官閒道官家中苦難迴花側葉與人別惟恐秋天絲線
乾紅縷歲蕤紫茸軟蝶飛參差花宛轉一梭聲盡重一

梭玉腕不停羅袖卷
中夜久睡髻偏橫釵欲墜
垂著肩合衣卧時參沒後
明燈起在鷄鳴前一足千金亦不賣
限日未成官裏恠錦江水涸貢轉多
宮中盡著單絲羅莫言山積無盡日
百尺高樓一曲歌劉禹錫浪淘沙
詩濯錦江邊兩岸花春風吹浪正
淘沙女郎剪下鴛鴦錦將向中流定
晚霞鄭谷錦詩文君手裏曙霞生
美號仍聞借蜀城奪得始知袍更貴
著歸方覺畫偏榮宮花顏色開時麗
池鳳毛衣浴後明禮部郎官人所重
省中

別占好窠名又布素豪家定不看若無文彩入時難紅
迷天子帆邊日紫奪星郎帳外蘭春水濯來雲雁活夜
機挑處雨燈寒舞衣轉轉求新樣不問亂離桑柘殘陸
龜蒙蜀錦裙說云侍御史趙郡李君好事之士也因余
話上元瓦官寺有陳后主羊車一輪天后武氏羅裙佛
幡皆組繡奇妙李君乃出蜀錦裙一幅示余長四尺下
廣上狹下濶六寸上減三寸半皆周尺如直其前則左
有鶴二十勢欲飛走率曲折一脰口中銜蓂莢軍右有

鸚鵡聳肩舒尾數與鶴相等二禽大小不類而隔以花
卉均布無餘地界道四向五色間雜道上累細鈿點綴
其中微雲鎖結互以相帶有若駸霞殘月流煙墮霧春
草夾徑遠山截空環牆古苔石泓秋水印丹浸漏粉蝶

集作
粉並

塗土染盤絢環佩雲隱涯岸濃淡霏拂靄抑冥
密始如不可辨別及諦視之條段斬絕分畫一一有去
處其繡繪纈綴柔美又不可狀也裏用繒綵下製綫尚
如舊兩旁皆解散蓋折減零落僅存此故耳縱非齊梁

物亦不下三百年矣昔時之工如此妙耶曳其裾者復何人焉因筆之為辭繼於錦譜之後俾喜詩者賦焉

牋

段氏游蜀記云竹維九種牋惟十色成都古今記云蜀牋十樣曰深紅曰粉紅曰杏紅曰明黃曰深青曰淺青曰深綠曰銅綠曰淺雲又有松花金沙流沙彩霞金粉桃花冷金之別即其異名

續博物志云元和中元稹使蜀營妓薛濤以十色彩牋

貽稹稹於松花紙上寄詩謝之其名有松花紙雜色流沙紙彩霞金粉龍鳳紙近年皆廢唯餘十色綾紋紙尚在南部新書云元和初薛濤好製小詩惜其幅大不忍長濤乃狹之因號為薛濤牋

蜀禱机王衍以霞光牋五百幅賜金堂令張蠙霞光即深紅牋也又有百韻牋以其幅長可寫百韻詩其次學士牋則短於百韻焉

唐范崇凱元凱兄弟俱有才名元凱贈兄詩云洛陽紙

價因兄貴蜀地紅牋為弟貧南北東西九千里除兄與
弟更無人鮑溶寄王播侍御詩云蜀川牋紙綠雲初聞
說王家最有餘野客思將池上學石楠紅葉不堪書李
義山送崔珏詩卜肆至今多寂莫酒壚從古擅風流浣花
牋紙桃花色好好題詩詠玉鉤

楊文公談苑云韓浦與弟洎皆有辭藻洎語人曰吾兄
為文譬如繩樞草舍聊蔽風雨予為文是造五鳳樓手
浦因寄洎蜀牋贈以詩曰十樣蠻牋出益州寄來新自

浣溪頭老兄得此渾無用助爾添修五鳳樓石守道以
燕脂板浣花牋寄徐合州詩合州太守鬢將絲聞說
歡情尚未衰板與歌郎拍新調牋供狎客寫芳詞文潞
公寄人蜀牋絕句素牋明潤如豐玉新樣翻傳號冷金
遠寄南都豈無意緣公揮翰似山陰此則冷金牋也司
馬君實蜀牋獻太傅同年葉兄詩西來萬里浣花箋舒
卷雲霞照手鮮書笥久藏無可稱願投詩客助新篇

貞觀故事云大明宮光順門外東都永福門外皆創集

賢書院學士通籍出入既而太府月給蜀郡麻紙五千
番東坡志林云川人取布頭機餘經不受緯者治作紙
名布頭牋冠於天下今六合人亦解作終是不及

寰宇記益州舊貢薛濤十色牋短而狹纔容八行益部
談資云薛濤井舊名玉女津在錦江南岸水極清澈石
欄周環久屬蜀藩為製牋處有堂室數楹令卒守之每
年定期命匠製紙用以為入京表疏市無貿者 予庚
戌秋過此詢諸紙房吏云每歲以三月三日汲此井水

造牋二十四幅入貢十六幅餘者存留乃作詩云七八
百年間陳事若俄頃西川錦江畔猶有薛濤并朝發春
花艷夕沉秋月冷所以可傳故問人人不省但云造彩
牋直貢君王前

元費著紙譜古者書契多編以竹簡其次用縑帛至以
木膚麻頭版布魚網為紙自東漢蔡倫始簡太重縑稍
貴人遂以紙為便倫宦者也傳多稱其能然受宮掖風
旨諂親貴猶宦者態也智足以創物而亦足以殺身第

於文字有功人至今稱蔡倫紙今天下皆以木膚為紙而蜀中乃盡用蔡倫法有玉板有貢餘有經屑有表光等紙玉板貢餘雜以舊布破履亂麻為之惟經屑表光非亂麻不用於是造紙者廟以祀蔡倫矣廟在大東門雪峰院雖不甚壯麗然每遇歲時祭祀香火纍纍不絕示不忘本也恩足以及數十百家雖千載猶不忘如此易以西南為坤位而吾蜀西南重厚不浮此坤之性也故物生於蜀者視他方為重厚凡紙亦然此地之宜

也府城之南五里有百花潭支流為二皆有橋焉其一
玉溪其一薛濤以紙為業者家其旁錦江水濯錦益鮮
明故謂之錦江以浣花潭水造紙故佳其亦水之宜矣
江旁鑿白為碓上下相接凡造紙之物必杵之使爛滌
之使潔然後隨其廣狹長短之制以造研則為布文為
綾綺為人物花木為蟲鳥為鼎彝雖云多變亦因時之
宜紙以人得名者有謝公有薛濤所謂謝公者謝司
封景初師厚也師厚創牋樣以便書尺俗因以為名薛

濤本長安良家女父鄢因官寓蜀而卒母孀養濤及笄
以詩聞外又能掃眉塗粉與士族不侔客有竊與之宴語
時韋中令臯鎮蜀召令侍酒賦詩僚佐多士為之改觀
期歲中令議以校書郎奏請之護軍曰不可遂止濤出
入幕府自臯至李德裕凡厯事十一鎮皆以詩受知其
間與濤唱和者元稹白居易牛僧孺令狐楚裴度嚴綬
張籍杜牧劉禹錫吳武陵張祐餘皆名士記載凡二十
二競有酬和濤僑止百花潭躬造深紅小彩牋裁書供

吟獻酬賢傑時謂之薛濤牋晚歲居碧雞坊叔吟詩樓
偃息於上後段文昌再鎮成都太和歲濤卒年七十三
文昌為撰墓誌謝公有十色牋深紅粉紅杏紅明黃深
青淺青深綠淺綠銅綠淺雲即十色也楊文公億談苑
載韓浦寄弟詩云十樣蠻牋出益州寄來新自浣花頭
謝公牋出於此乎濤所製牋特深紅一色耳偽蜀王衍
賜金堂縣令張蠙霞光牋五百幅霞光疑即今之彤霞
牋亦深紅色也蓋以胭脂染色最為靡麗范公成大亦

愛之然更梅渚則色敗姜黃尤難致遠公以為恨一時把玩固不為久計也紙固多品皆玉板表光之苗裔也近年有百韻牋則合以兩色材為之其橫視常紙長三之二可以寫詩百韻故時人便其縱濶可以放筆云

凡紙皆有連二連三連四售者連四一名曰舡牋又有青白牋背青面白有學士牋長不滿尺小學士牋又半之倣姑蘇作雜色粉紙曰假蘇牋皆印金銀花於上承平前輩蓋常用之中廢不作比始復為之然姑蘇紙多

布紋而假蘇版皆羅紋惟紙骨柔薄耳若加厚壯則可勝蘇牋也 蜀牋體重一夫之力僅能荷五百番四方例貴川牋蓋以其遠號難致然徽紙池紙竹紙在蜀蜀人愛其輕細客販至成都每番視川牋價幾三倍范公在鎮二年止用蜀紙省公帑費甚多且恠蜀諸司及州縣緘牘必用徽池紙范公用蜀紙重所輕也蜀人事上則不敢輕所重矣此以價大小言也余得之蜀士云澄心堂紙取李氏澄心堂樣製也蓋表光之輕脆而精絕

者中等則名曰玉水紙最下者曰冷金牋以供泛使
廣都紙有四色一曰假山南二曰假榮三曰冉村四曰
竹絲皆以楮皮為之其視浣花牋紙最清潔凡公私簿
書契券圖籍文牒皆取給於是廣幅無粉者謂之假山
南狹幅有粉者謂之假榮造於冉村曰清水造於龍溪
鄉曰竹絲蜀中經史子籍皆以此紙傳印而竹絲之輕
細似池紙視上三色價稍貴近年又倣徽池法作勝池
紙亦可用但未甚精緻爾 雙流紙出於廣都每幅方

尺許品最下用最廣而價亦最賤雙流實無有也而以
為名蓋隋煬帝始改廣都曰雙流疑紙名自隋始也亦
名小灰紙



蜀中廣記卷六十七